

Futbola

Iruretak berak erabakiko du Kovacevic zelairatu edo ez

Escobar medikuak dio aurrelaria bihar jokatzeko moduan dela

Raleko entrenatzaileak nahi baldin badu, Darko Kovacevicek bihar Anoeta estadioan Zaragozaren kontra jokatu egingo du. Aurrelariak taldeko medikuaren baimena behintzat badauka, «belauna ongi duelako». Jokalariak atzo saio gogor samarra egin zuen, eta amaieran ongi dagoela erantzun zuen. «Iruretak du azken hitza», zioen.



Darko Kovacevicek dioenez, Iruretak dauka azken hitza.

JACOBA MANTEROLA

Enekoitz Esnaola / Donostia

«DARKO KOVACEVIC jokatzeko moduan dago». Horixe esan zuen atzo goizean Eduardo Escobar sendagileak. «Kovacevic atzo —herenegun— baino hobeto dago gaurko entrenamenduaren ondoren. Belauna ongi dauka. Aste honetan giharrak eduki ditu pixka bat kargatuta, baina normala da hori, meniskoko ebakuntzaren ondoren geldirik egon baitzen egun batzuetan, eta gero entrenatzen hastean, bada, kargatu egin zaizkio. Baina giharrak ere hobeto ditu», zioen Escobarrek. «Orain entrenatzaileak erabaki beharko du zer egin».

Realak gaur egingo du asteko azken entrenamendua, Anoeta

estadioan ateak itxita. Kovacevic ez zuen parte hartu ostegun arratsaldean taldeak eginiko partidu txikian, baina medikuek esanda ez zuen parte hartu. Atzo egin zuen aurrelari serbiarrak orain arteko saiorik gogorrena, eta arazorik gabe moldatu zen. Herenegun Kovacevic ez zegoen oso baikor, ez baitzuen uste bihar Zaragozaren kontra hasieratik jokatzeko moduan egongo zenik, baina atzo zioenez, ongi dago «eta entrenatzaileak du azken hitza».

Benetan harrigarria izan da Kovacevicen errehabilitazioa, abenduaren 20an egin zioten-eta operazioa. Franco Baresi italiarriak duela hiru urte izandako errehabilitazio ikusgarri hura datorkigu burura: 1994ko EEB-

Betako Mundialeko lehen partiduan Norvegiaren kontra meniskoa hautsi zuen eta egun bat geroago —ekainaren 24an— ebakuntza egin zioten, baina uztailaren 17an Brasilen kontrako finala jokatzeko gauza izan zen.

Irureta eta Gomez bildu egin dira

Iruretak eta Juan Gomezek bilera eduki zuten herenegun arratsaldean, bien arteko ikamika konpondu ahal izateko. Bileran biak bakarrik egon ziren, eta Gomezek Argentinara egin duen bidaiak sortu duen liskarraz hitz egin zuten. Dena den, ez dirudi jokalaria oso gustura irten zuenik batzarretik, ez zuelako adierazpenak egiteko gogo handirik atzo goizean Zubietan.

Asteartean Hernanin: Real-Girondins

BERANDU baina lortu dute Hernani taldekoek Realaren eta Girondins-en arteko partidua antolatzea. Datorren asteartean jokatu da Zubipe zelaian. Hernanin urrezko ezteiak direla-eta antolatu dute neurketa hori, lau urteko atzerapenarekin, 1993an bete baitzituen 50. urte Gipuzkoako aipatu talde horrek. Iazko maiatzean zen jokatzeko Real-Girondins partidua, baina azkenean Frantziako taldeak

ez zuen etortzerik izan eta ez zen jokatu, Hernanikoen zoritxarrerako. Orain ikusi dute batzuek aukera, eta urrezko ezteiak antolatzeko eratu den batzordeko bi kidek atzo Zubietan adierazi zuten Girondinsek ez duela eragozpenik jarri. «Realaren borondate ona ere eskertu beharra dauka, edozein unetan eta dohainik jokatzeko prest egon baita. Expositori eman behar eskerrak, batez ere», zioen atzo Jo-

se Mari Irastorzak.

Bai berak bai Fermin Cuestak zera azpimarratu zuten: «Hasiera batean norgehiagoka 19:00etan hasiko zela genioen, eta karteletan ere halaxe ageri da. Baina orain Girondinsek eskatu digu 18:00etara aurreratzea. Azkenean onartu egin dugu». Euskal Tebistak diferituan eskainiko du gauean.

Irastorzak eta Cuestak esan zutenez, «Girondins bere talde onenarekin etorriko da». Eta

ez du nolanahiko taldea Girondinsek, Frantziako Ligan laugarren postuan baitago sailkatuta, nahiz eta denboraldi honetan baja anitz izan di-tuen: Lizarazu, Witschge, Dutuel, Dugarry... Orain Papin aurrelari frantziarra bere jokalaririk alpagarriena da. 35.000 libera kostako zaio Hernaniri Girondins ekartzea (milioi bat pezetak inguru). Sarrerarik garestiena bi mila pezetako izango da. Merkeena 500ekoa. x

laburrean

HALTEROFILIA

■ Suleymanoglu, hiru aldiz txapeldun olinpikoa, erretiratu egin da

NAIM SULEYMANOGLU turkiar ospetsuak halterofilia uztea erabaki du, «jadanik ez baitu ezer erakusteko». Eta ez du arrazoi faltarik bere argudioan, hiru aldiz jarraian izan delako txapeldun olinpikoa. Azkeneko aldiz Atlantan, 64 kiloko kategorian. Bera izan zen Joko horietako izar nagusietakoa. Suleymanoglu 19 urte egin ditu kirol horretan. Urte horietan guztietan bi porrot baino ez ditu jaso 1,53 metroko eta 29 urteko halterak. Orain bere asmoa entrenatzaile izatea da. Dena den, Enver Turkileri hautatzaile turkiarrak esan du litekeena dela Suleymanoglu Turkiako selekziozko zuzendari tekniko izendatzea. x

ESKUBALOIA

■ Atavinen Granollers bisitari izango da gaur Arrosadian

ASOBAL LIGAKO azken tokietan dagoen Granollers izango da gaur bisitari Iruñeko Arrosadia kiroldegian, Lagun Aro San Antonioren aurka jokatzeko (18:30). Kataluniarrak oso gaizki ibili dira denboraldi guztian zehar, baina gaur oso aurkari arriskutsua izango da Zupo Ekisoainen gizonentzat. Izan ere, Viatxeslav Atavin osatu zenetik, Ligan jokaturako partidu bakarra irabazi egin du Granollersek, eta Alemanian jokaturako Europako Superkopa Bundesligako liderra, Lemgo taldea, menderatu zuen. Errusiarrarekin, betiko talde gogorra bihurtu da Granollers, eta Lagun Arok partidu polita egin beharko du puntuak eskuratu ahal izateko. x

SASKIBALOA

■ Pineda-Askatuak eta Gijon-Patronato partiduak gaur LEB Ligan

LEB LIGA martxan izango da gaur berriz ere, bi asteko atsedenaren ondoren. Bi euskal taldeek kanpoan jokatu dute. Donostiako Askatuak, Pineda Viajes Aliguer-en kantxan ariko da (19:00). Ez du partidu erraza izango, Pineda bigarren baitago sailkatuta. Donostiarrak, berriz, azken postuan daude. Bilboko Patronatok, Jorge Garcia eskolta fitxatu berriarekin, Gijonen jokatu du (19:00). Gijon laugarren doa eta Patronato azkenaurreko tokian. Kostako zaie bi euskal taldeei beharrezkoa duten garaipena lortzea gaur. x

■ Portlandek urrats garrantzitsua eman du Houstonen irabazita

PORTLAND TRAIL BLAZERS-EK ez zuen ongi hasi NBAko denboraldia, baina gero eta hobeto dabil. Azken jardunaldian, esaterako, Houston Rockets indartsuaren kantxan erraz irabazi du: 96-112. Mendebaldeko bosgarren tokian da orain Portland. Iragan udan fitxaturako Isaiah Rider eskolta eta Kenny Anderson basea izan ziren talde horietako onenak atzo: Riderrek 31 puntu lortu zituen, eta Andersonek 23 puntu eta hamar asistentziako marka. Talde bereko Arvidas Sabonis pibot lituaniarrak 18 puntu, 12 errebote eta bost asistentzia egin zituen. Houstoneko onenak: Charles Barkley (30 puntu) eta Hakeem Olajuwon (22). Beste emaitzak: Charlotte 107, Dallas 97; Cleveland 103, Phoenix 94; Detroit 88, Boston 87; Miami 101, New Jersey 91; Orlando 96, Toronto 94; Washington 80, New York 92; San Antonio 83, Utah 80; Seattle 96, Sixers 82; Sacramento 83, Lakers 90. x

E S K I A

■ Panzanini garaile Mariborko erraldoian; Ibarra ez zen bigarren txandara sailkatu ere egin

AINHOA IBARRA bizkaitarrak ez zuen Mariborko (Eslovenia) erraldoiko bigarren txandara pasatzerik izan. Ibarrek 1.23.64ko denbora behar izan zuen jaitsieran, baina beste asko bere aurretik geratu ziren, eta eskiatzaile bizkaitarra, Sierra Nevada Mundialeko erraldoian zortzigarrena, bigarren txandara pasatzeko gelditu zen zoritxarrez. Bi txandak jokatu ondoren, Sabina Panzanini italiarra izan zen garailea. Munduko Kopako sailkapen orokorrean, Pernilla Wiberg suediarra doa aurreneko postuan, 618 punturekin. Katja Seizinger alemaniarra da bigarrena, 534rekin. x

K R O S A

■ Uliako Kroseko antolatzaileek azkenean Abel Anton ekartzea lortu dute

ABEL ANTON espainiarra izango da astelehenean Donostian korrituko den Uliako Kroseko izar nagusietako bat. Uliako antolatzaileek aste honetako aurkezpenean esan zuten artean lotzeke zutela iaiz garaile izan zen Anton, eta ahalegin guztiak egingo zituztela ekarri ahal izateko. Azkenean lortu dute, eta Anton bera —besteak beste, Europako 10.000 metroetako txapelduna— izango da faboritoetako bat. Alberto Juzdado espainiarrak, aldiz, ez du korritzerik izango. Uliakoaren aurretik, baina, beste kros garrantzitsu bat korrituko da Gipuzkoan: bihar goizean, Elgoibarko Juan Mugerza. John Brown galestarra izango da faborito nagusia. x